

Mateo 10:37–39

Sa matag pares o sa ginagmayng grupo, tun-i og dungan ang gi-assign nga mga bersikulo ug hisguti ang inyong mga tubag sa mga pangutana.

Basaha ang Mateo 10:37–38, nga mangita sa mga sakripisyo nga gisulti sa Manluluwas nga kinahanglang andam nato nga buhaton isip Iyang mga disipulo. Ang mga pulong nga “takus kanako” niini nga mga bersikulo nagpasabut nga mahimong takus nga representante sa Ginoo ug angayan sa Iyang mga panalangin.

- Ngano kaha nga gikinahanglan man sa mga disipulo ni Jesukristo nga higugmaon Siya labaw sa uban—lakip ang mga sakop sa kaugalingon nilang pamilya?

Ang krus nga gihisgutan sa bersikulo 38 nagpasabut sa krus nga gipas-an ni Jesukristo ug gilansangan sa pagtuman sa kabubut-on sa Amahan. Sa paghulagway, gitawag ni Jesukristo ang Iyang mga sumusunod nga “magpas-an sa [ilang] krus, ug magsunod [Kaniya]” (Mateo 16:24).

Basaha ang Hubad ni Joseph Smith, Mateo 16:26 (diha sa Ang Giya sa mga Kasulatan), ug tan-awa unsay ipasabut para nato nga magpas-an sa atong krus ug magsunod kang Jesukristo.

Basaha ang Mateo 10:39, nga mangita sa mga baruganan nga gitudlo ni Jesukristo bahin sa sakripisyo. Ang Hubad ni Joseph Smith nagklaro sa sinugdanan niini nga bersikulo nga mabasa, “Ang makakaplag sa iyang kinabuhi . . .”. Niini nga mga pulong, ang mga pulong nga “makakaplag sa iyang kinabuhi” nagpasabut nga magpakabuhi sa kahakog kay sa magtinguha nga makaserbisyo sa Dios ug sa Iyang mga anak.

- Sa inyong hunahuna sa unsang mga paagi ang mga tawo nga nagtutok sa kaugalingon nilang kabubut-on ug hinakog nga mga tinguha sa katapusan “kawagtangan” sa ilang kinabuhi?

Basi sa inyong nabasahan, kompletuha ang mosunod nga baruganan:

Kon tinguha nato ang pagkaplag sa atong kinabuhi, nan _____.

Hunahunaa ang pagmarka sa bersikulo 39 sa saad nga gihimo sa Manluluwas ngadto sa magawagtang sa ilang kinabuhi tungod Kaniya. Ang pagwagtang sa atong kinabuhi tungod Kaniya mas labaw pa kay sa andam nga mamatay tungod Kaniya. Nagpasabut kini sa kaandam nga motugyan sa atong kaugalingon matag adlaw sa pagserbisyo Kaniya ug sa mga tawo sa atong palibut.

- Unsa sa inyong hunahuna ang gipasabut nga makakaplag kita sa atong kinabuhi kon kawagtangan kita niini tungod Kaniya?

Basi sa inyong nabasahan, kompletuha ang mosunod nga baruganan:

Kon kawagtangan kita sa atong kinabuhi tungod ug alang kang Jesukristo, nan _____.

Basaha ang mosunod nga pamahayag ni Presidente Thomas S. Monson ug dayon hisguti ang inyong mga tubag sa mga pangutana nga nagsunod.



“Ako nagtuo nga ang Manluluwas nagsulti kanato nga gawas kon kalimtan nato ang atong kaugalingon diha sa pagserbisyo sa uban, adunay gamay ra nga katuyoan ang atong kaugalingong kinabuhi. Kadtong kinsa nagpakabuhi lamang alang sa ilang kaugalingon sa katapusan maminusan ang ilang pagkatawo ug sa mapasumbingayong paagi mawagtangan sa ilang kinabuhi, samtang kadtong nahikalimot sa ilang kinabuhi diha sa pagserbisyo sa uban motubo ug molambo—ug sa ingon moluwas sa ilang kinabuhi” (“Unsa may Akong Nabuhat alang sa Usa ka Tawo Karon?” *Ensign* o *Liahona*, Nob. 2009, 85).

- Kinsa man ang inyong nahibaloan nga mipili nga kawagtangan sa iyang kinabuhi tungod ug alang kang Jesukristo? Unsa ang epekto niini nga desisyon ngadto niining tawhana?

